

# Penyelesaian secara menyeluruh isu beras

Oleh **ARIF AIMAN ASROL**  
dan **NURUL IRDINA SUMALI**  
utusannews@mediamulia.com.my

**KUALA LUMPUR:** Kerajaan akan menyelesaikan secara menyeluruh isu beras negara yang dihadapi oleh para pengilang bumiputera dan pesawah di seluruh negara.

Antara langkah yang akan diambil ialah mengumumkan kenaikan harga lantai padi yang munasabah, peruntukan RM1 bilion kepada Lembaga Kemajuan Pertanian Muda (MADA) dan mengatasi penyelewengan yang menjejaskan produktiviti pengeluaran padi dan beras negara.

Perdana Menteri, Datuk Seri Anwar Ibrahim berkata, keputusan itu hasil perbincangan bersama Kementerian Ke-

- Harga lantai padi diumumkan minggu depan
- Peruntukan RM1 bilion kepada MADA
- Atasi penyelewengan

wangan bagi memastikan keseimbangan harga dalam pasaran beras tempatan.

Selain itu, katanya, kerajaan juga akan menampung sebahagian daripada kenaikan harga lantai padi yang akan diumumkan minggu depan dengan peruntukan sebanyak RM150 juta dalam tempoh enam bulan.

“Kerajaan komited untuk memastikan harga beras tempatan kekal stabil dan tidak membebankan pengguna.

“Peruntukan RM150 juta ini akan dimuktamadkan dalam masa terdekat bagi menampung perbezaan harga yang berlaku dalam pasaran,” katanya di Dewan Rakyat semalam ketika menjawab soalan Datuk Seri Dr. Ronald Kiandee (Beluran) yang memintanya menyatakan adakah kerajaan komited dalam memperjuangkan nasib pesawah.

Mengulas lanjut, Anwar berkata, kerajaan sentiasa peka dengan nasib pesawah dan disebabkan itu, di era kerajaan Madani, banyak bantuan dan skim disalurkan kepada pesawah.

**Bersambung di muka 2**



## Sidang pertama

**PERDANA** Menteri, Datuk Seri Anwar Ibrahim ketika menjawab beberapa soalan yang dikemukakan ahli-ahli Parlimen antaranya berkaitan isu padi beras negara pada Mesyuarat Pertama Penggal Keempat Parlimen ke-15 di Dewan Rakyat, Kuala Lumpur, semalam. - **JABATAN PENERANGAN**

# Penyelesaian secara menyeluruh isu beras

## Dari muka 1

“Kita cuba naikkan, tetapi ada masalah. Kawasan padi di Perlis dan Kedah produktiviti agak rendah, tidak seperti di Sekinchan, Selangor.

“Sebelum ini, tidak ada langkah tegas yang berani dibuat. Hanya setelah kerajaan Madani, barulah bantuan khas ini ditambah RM600 setahun bagi pesawah yang sebelum ini tidak pernah dibuat,” katanya.

Bagi merencanakan produktiviti pengeluaran padi di Kedah, kerajaan bersetuju memberi peruntukan sebanyak RM1 bilion kepada MADA akhir bulan ini.

“Usaha kita untuk meningkatkan produktiviti. Kita telah luluskan RM1 bilion untuk MADA yang akan luncurkan akhir bulan ini supaya kawasan

sawah yang ada penambahan RM1 bilion itu boleh menjamin penambahan produktiviti.

“Sekurang-kurangnya usaha itu dapat memenuhi daripada sekitar 56 peratus keperluan tempatan sekarang kepada 70 peratus,” katanya.

Mengulas lanjut, Anwar berkata, kerajaan turut memperkenalkan Skim Takaful Tanaman Padi pada awal tahun lalu dengan peruntukan dana awal sebanyak RM50 juta.

Untuk Sabah dan Sarawak, Kerajaan Persekutuan turut menyalurkan peruntukan lebih RM400 juta untuk menampung harga beras terlalu tinggi di negeri terbabit.

“Jadi untuk 2023 dan 2024, kita salurkan peruntukan khas kali pertama sebanyak RM420 juta di Sabah dan Sarawak untuk menampung dan menukar-

kan harga supaya tidak melambung terlalu tinggi,” katanya.

Dalam pada itu, Anwar juga turut menyentuh mengenai penyelewengan yang diakui antara faktor menyebabkan produktiviti pengeluaran padi dan beras di negara ini terjejas.

Bagaimanapun, beliau menyerahkan kepada pihak berkuasa untuk menjalankan siasatan berkaitan isu tersebut.

“Saya tidak mahu nafikan berlaku penyelewengan. Biar badan penguatkuasa siasat. Saya juga teliti kenyataan Menteri Besar (Kedah), kalau ada bukti maklumkan kepada kita untuk diambil tindakan.

“Tetapi yang nyata adalah produktiviti pengeluaran padi di Kedah, Perlis, Kelantan dan Terengganu itu sangat rendah berbanding di Sekinchan,” katanya.